



兩當軒二

柳田文庫
文庫11
D 191
2



文庫 11
D 191
2

柳田泉序

010190555874



兩當軒集卷第五

武進黃景仁著

古近體詩五十六首

新安與洪稚存

昔臥碧溪月日對天都雲芳尊獨傾倒扼腕無夫君哀援
與落狖一一悲離羣轉徙四五年此間忽攜手名山對故
人問我開懷否甫見藤蘿花今來蔭溪路溪邊一片石我
坐思君處相思亦云切相見幸勿疏且有向平約百年方
及初

夜行

躑躅行宵路蒼茫不自愁無人烟草闊繞足水泉柔柝遠

集五

疑村近星明識徑幽未知身過處可有屐痕留

春城

春城久陰雨欣見白日輪照我歎羈寂更照東西鄰東家娶新婦開筵羅衆賓烹臠香徹舍喧笑夜達晨西家屋頽破中有新死人牀頭老嫗哭哭子聲酸辛共此日光裏哀樂胡不均無情感過客側耳繼嘸呻觸懽歎無憚聞戚幸有身俄頃眾慮集首念依閭親有子常若無不得相對貧孤燈耿白髮茹苦何能伸亦有蓬頭妻抱病臥積薪自爲我家婦饑釜常生塵門戶持女手何以能支振一身尙乞食所遇猶遑速言念忽及此滂沱涕盈巾若語東西家哀樂稍可勻更欲起相告事運多相因啼笑互乘伏迎送如

輪巡所見盡逆旅何者堪爲真

道中偶成

在家習便散手足忘勞劬筋疲肉驚爛櫛沐曉臥更厭當關呼在路不自山雞鳴輒催發萬家曉夢猶未醒帶黑城門半呀豁出城歷亂經溪塘野風吹來沁骨涼霧收山色隔林見日出人影欹波長車幃不卷續餘夢夢聞人語過村莊飢來道旁飯飯罷復危坐塵頭漸障嵐氣昏鈴語時聞鳥聲和閒吟閒眺睡復醒百折紆途若緣磨城郭仍從暝色逢市塵又向燈前過一椽待我宿嗒然解囊臥一日復一日一宵仍一宵去路日以遠別家日以遙一衣與一食千里懸相招呼嗟勞人亦已勞何日歸作西峰樵

西巖石佛像

古壁呼燈照天然金粟裝石開生外相雲見定中光已覺
空山靜還愁過客忙大千煩惱意合眼未能忘

夜聞新安江聲

練江新漲萬馬似我初聞聲當戊年寓齋去江及里許尋
聲直在臥榻邊重城魚鑰鎖不住稍厭空夜喧無眠今來
寓齋去較遠聲亦少殺非從前誰知夢醒忽震耳澆胷蕩
魄逾喧闐竹牀泉兀雜心動紙帳掣曳如人舉曉來靜聽
歛無有但以沈響追風絃臨窗啜茗清澈益卽是此水相
烹煎因思昨來十日雨桃花漲落千山顛豈無蘭椒并神
漢亦帶黑蜨青蛟涎水雖可愛亦可畏更憶往事心懸懸

當時初度飲此水一月對飯不下咽頭岑腹塊雜嘔泄服
習許久方平痊今來依舊飲此水此患免否惟隨天窮薄
久已輕性命但感時事多推遷臨川徒作孔尼歎論水且
續莊生篇百壺明往醉江上飽看急溜飛長烟

啼鳥行

白項老烏何所求啣嗚呀啣啼簷頭須臾乃有千百至黑
雲一片風颼颼啼聲潮沸雜悲怒問之旁人得其故朝來
設肉網其一此間卽是張羅處此時啼鳥啼更悲更有挾
彈鄰家兒弦聲一響烏四起一烏傷重拍地飛我觀此狀
淚不止彼爲呼羣身更死明知無益痛繫心物類相憐有
如此誰歟羅者伊來前我今售放拌百錢毛蓬脰縮曳之

出甫一脫手翔飄然誰知老烏伺牆角突起追飛羽聲肅
邀之使轉啼而簷爾縱知恩去宜速人不如烏能種情所
恨缺陷難爲平悲歡離合幸無恙何日能令死者生

牆上蒿

牆上蒿託身何高高託身雖高託根孤主人家有屋上烏
烏飢牆頭啄寒蟲啄蒿飄飄墮隨風主人雖愛惜不能使
烏不得食烏得食烏高飛同作寄人活彼此何用相仇爲

春江曲

良工製船舷周回駕吳榜春江正花月緩載桃根往觀者
艷若仙中流玉簫響深夜江妃遊和歌鼓纖掌輕風吹我
襟水雲激空朗底用員嶠浮何必支機訪庶幾鴟巨人與

話烟波賞

門有車馬客

門有車馬客借問客何爲憶昔共杯酒高誼薄雲雷西遊
灞陵道東訪燕昭臺君乘駕高足我馬方虺虺詎關時命
蹇升沈各異才客爲主人言言言使心哀詎以陌上花忘
茲谷中薤發篋出文綺探懷出青瑰要脫明月珠手奉黃
金杯慨然起相壽將進仍徘徊長揖笑相挽客今胡爲哉
本生各有節士生各有懷秉素苟不渝何用相炫財脫復
其存問相好無相猜

道中

西行及余月身與萬物旅鵠鳴我前千山富梅雨憂食

及麥秋憩勞戀槐午深嶂畱餘春高原逆初暑芳景一以
移恍若歲無主空緬曲宴賞方乖浣花侶長爲陌頭人日
月不我與

古歌

豹兮苦廉狼兮苦貪狼心憂飢豹身憂肥狼有膏而戕其
軀兮豹亦憂其有皮疑斯用顧智則隱霧同空山之巖巖
兮無相視之眈眈兮

客夜

空館綠苔閉步看珠斗斜移牀隨落月滅燭對孤花水調
鄰家笛雷音夢裏車離憂損年少頓袖一長嗟

江上曉行

蠓磯俯蠓穴曉作十里霧我行忽入之茫茫失歸路膠舟
識浮沙聞臭辨芳杜豈無日輪照倉卒不可度江妃慘娉
婷漢女愁延伫相望迷漫閒何由躡靈步

冬夜

空堂夜深冷欲掃庭中霜掃霜難掃月畱取伴明光

重遊齊雲山

仙扃自古難再到茲山石門常洞開丹崖翠嶂皆舊識名
山與我真緣哉昔逢珠簾卷今見珠簾垂雨君深洞窈莫
測爐烟對面風吹吹風吹爐烟滿山起或沒山腰或山背
移時一片兜羅縣忽此躡身化城裏豈惟舊遊不可識對
面都如隔千里三姑五老望隔雲雲中笑語如可聞似言

十載陌頭客何復來探山中春手披雲開出真相對我媯
然果無恙雲生雲滅凡幾度石火光問何遠終當麤畢
向平心來向雲中抱雲住

葉嶺

隔溪見崇嶺剗削眩直睹一石當折流衝剝幾千古自離
白岳來計程卅里許岳勢信瑰奇弁兜太洵武行行漸平
衍茲嶺忽峭舉一洗磊砢形青空縱飛舞支峰轉徑得瞥
眼巨靈斧石理作斜皺僵極流媚嫵我行探黟山茲或一
班數回頭視羣峯咄哉噲等伍

小溪

千山一澗落客程遶之進溪枉塗勢卻塗轉溪響迅沿回
爭向背趨避叛逆順時犯積磴危石氣撲衣潤心揚急湍
洶意靜重嵐鎮投險得自存卽事消悔吝未冀妙善同用
矢冰淵慎斲就村居人居行相勞問雞犬無世音風水激
宵韻信宿不得畱修程尙追趁

山鏗

自離小溪來趨途又廿里未覺我行疾因悅山水美山非
極高水非深無一直處方耐尋人家半透白雲塢嵐翠閒
染桃花林是時春殘夏將續百舌聲枯雨鳩逐不知身入
濃陰閒但覺逢人鬢鬚綠畫圖此景見亦無那得便徙全
家居桑麻底用思杜曲雞犬或恐猶秦餘傳聞此鄉人十
有九作賈溪山如此不思歸覓得錢刀亦何補沙邊少婦

來浣衣穉子自守林閒扉小橋道我入村去飽飯再逐溪
雲飛

浴湯泉

黃山湯泉天下無神竇養自天荒初帝憐末世物疵癘故
遣晚出天之都百靈湯沐此焉在金支翠羽羣來趨騰烟
結蓋護氣核潛火立柴蒸地腴軒皇昇去丹液在一任裸
濯來凡愚東南況復地卑溼已疴保性能無需旁兼穴沈
劑熯返下迸珠縷衝肌膚不遣日月燭靈脈風輪細碾金
沙鋪我來正值春雨後桃花淺漲方縈紆伐毛洗髓欠福
命塵土腸胃聊滌除須臾漿變五雲液宛轉露結三危珠
我生何幸一相值便欲移傍茲泉居側聞他處五十九流

黃磬石源非殊驪山禍水不足道或供爛鳥堪遊魚山圖
与乘空籍籍得名雖後庸傷乎欲叩斯理終茫如徑欲手
曳容成裾問渠乞得縮地法看此狡獪洪鈞爐

夜從慈光寺步至茅蓬菴再浴湯泉

羣峭森積聳古壁暗光射耳受萬瀑聲神清不離舍披衣
踏嶺行磴滑絮雲藉陰蒨逗全墨堦塞羅萬訝佛燈引半
巖老僧遠相迓屋後泉氣蒸再沐及清夜暖觸澣仰甌膩
捫乳滴罅瘳痼去無臆酷馥嗅非乍振衣崖千尋骨冷待
烟化亮無雲中人及此整風駕

慈光寺前明鄭貴妃賜袈裟歌

山僧篝火登佛樓發篋示我前朝物水田一龔鏤彩成光

燄至今猶未歇嶺猿睥睨山禽驚想見一騎中官擊當時
佞佛成闡教九蓮衍得椒房名昭華寵占六宮冠十方建
寺誰能爭是日君心眷如意宛轉星前誓神器久看幻海
漫陰氛可奈廷臣與家事神廟移歸玉合空百劫難添蠹
餘字從可添絲繡佛龕誰教結習猶眈眈漸報蛾羣起河
北尙聞盧稅賜淮南轉眼身肥不能走賊前請命嗟何有
可憐佛遠呼不聞有福祈來付杯酒洛陽宮殿安在哉珠
襦玉匣飛成灰猶餘此物鎮初地空山閱得滄桑來君不
見南朝三百六十寺至今一一荒烟裏又不見蕭梁同泰
何崔巍朝聞舍身夕被圍銅駝荆棘尋常見何論區區一
衲衣

由慈光寺至老人峯
孤發靡有極出寺鐘送響始徑祇壁立繼棧漸蛇枉一泉
噴巖下陰澗走澆瀆餘支忽橫漫繭足破之上瞑眩心搖
旌飄簸谷張網離屬羣峯形巨力擘靈掌行行避攫拏境
境得愾慌託命藤繫石靡瞰匪千丈怯氣凝慮併道心忘
我長百悟羅英蒼羣妙展佚蕩元關且未窮中勢無息壤
奠哉雲中觀彌空有餘仰

文殊院

地接諸天近山經萬劫空丹砂仙火外山鬼佛光中倏忽
雲霞相微茫斧鑿功人閒定何世離立轉忡忡

白猿

黃山白猿千年物出沒無時不知穴裏身只借千巖雲療
飢惟餐太古雪老僧誦號至夜分下階看天猿在門呼之
不來近不避元元默默西來意曉來乃在蓮峯頭忽復吟
聲隔遙翠遊人千百少一逢應知只在茲山中山空日暮
無可託我欲拾橡來相從

題文殊院

悟來千嶂失嶙峋是象俱含太古春每見孤花山意露偶
聽幽梵夜心真雲霞境幻全宜佛魑魅形空不喜人招手
諸天容借問此閒曾轉幾回輪

山中見月

三更方見月身在亂峯中音樂鳥啼夜旃檀香布空塵心

雲縷滅人語谷聲通不寐尋幽去山深未可窮

天都峯

昔游厭培塿離地苦不高抱此十年志乃與茲峯遭天風
捲游袂羣峭爭來朝地軸昔傾折屹立支崇標一障東南
山不遣隨海濤陰陽拆支脈散衍如牛毛匡廬及天目得
一皆自豪開鑿此最後靈秘常中韜藏景達休彩夜夜燭
斗杓誰遣浮邱徒挈袖來遊遨精氣盜已盡所賸粕與糟
真宰一上訴許與人氣交茲峯獨峻絕一力當青霄太古
積霞氣鬱作青精苗世人不能采采之壽松喬嗟嗟含生
儔膏火紛煎熬孤心八卑視八表何寥寥

黃山松歌

黟山三十有六峯峯峯石骨峯峯松有時松石不可辨一
理交化千年中丹砂琥珀其胎孕亭亭上結朱霞封人言
松相遜石相卽以松論何能窮沐日浴月暈蒼翠苔色散
點周秦銅鞮綏上偃雨君蓋糾結下固蚪靈宮鱗張鬣縮
爪入肉萬劫避過雷火攻昔觀圖畫訝未見到眼更覺描
無功懸崖嵌峒不知數莘莘縱縱皆鬼工及至觸手膏溢
節極瘦駁處春華同清泉洗根瀉泐溱瑤草分潤生蒙茸
翻嫌石相奇太過相助爲理論始公青牛伏龜不可得幾
輩對此顏如童明當遍覓茯苓去短鋤碎劖干芙蓉

小心坡

世險不到處茲坡名小心側棧受半履石滑不可任上嶺
怒欲壓下有無窮深削壁絕捫據長雲蕩其陰飛空苦無
具至此毛髮森人言小心度我以無心臨同遊少人色牛
喘漣汗淋對之忽大笑勸然搖井參山靈喜顏色樂奏來
仙禽提心一跌坐萬態何沈沈

遇雨止雲谷寺

暈日暗東嶺慘霧忽上蒸中途遂雷雨寸步迷峻嶒電光
得峯竅萬道金蛇騰側身進虎隊徹骨寒生稜雲根積露
瞠石髮黏鬚鬢縱有亥豎足欲展嗟何能同隊匿咫尺千
喚不一膺屏翳稍卻怒漸放重巒層匿者乃四出迎客來
山僧扶曳逗靈刹快得樓窗凭驚傳適來處已有懸崖崩
齋廚列蔬果茗味更清絕老僧喜相告幸未山水發往年

梅雨多嶺逕每漂沒崖顛田數畝衝入萬丈窟閒有樵蘇
人焉能辨存歿聞言笑謝之毋爲詫咄咄如此名山中豈
受征夫骨不禱得神庇我心滋臬脆衣薄深山寒且與煨
榾柮

鋪海

海因雲得名雲在海亦在雲空海更空轉瞬已遷改甫看
膚寸倏滿天幻境萬萬還千千須臾千萬合爲一呼仙卽
仙佛卽佛迷婁寶界三神山縹緲虛無現旋沒返照一縷
衝波開彩翠細鏤金銀臺初疑百萬玉鯨鬪闌入一道長
虹來元元默默坐相對真宰茫茫竟何在輕風吹合復吹
開白衣蒼狗須臾態我欲雲門峰化爲并州刀持登天都

最高頂亂剪白雲鋪絮袍無聲無響空中拋被遍寒士無
寒號英英蒼蒼出山骨何用漫空作奇譎

黃山尋益然和尚塔不得偕邵二雲作

眼界徹上下忠義不可逃大覺上上乘立腳宜堅牢明季
益然師大節邱山高夙業秉奇慧四大窮秋毫偶然俯塵
世怨水流滔滔置身君父閒窮數百六遭二十舉孝廉撫
事心忉忉憤此蛾子蠢發篋窮豹韜永嘉渡倉卒內難紛
如鼉奇禍知不遠手少尺柄操傾家結流亡破膽同煎熬
杭陸越嶠戶浙水爲長濠一一聚米籌夜臥常枕破建業
一失守奮呼驟霜鱗思文入汀漳遙應鳴金罄草閒拜即
罰轉戰折戟戮一舉事不成天命堪哀啓揚帆度浙海草

草揮旌旄軍中授司馬慷慨君恩叨左支復右絀絲盡不
可縑填海有精衛負陸無巨鼈膠舟再淪覆隻影竄棘蒿
全身入西竺從此離塵囂誅茅吳山顛樾黑峰巒瘡癩
洗澗瀑劒術教猿猴夜誦感石裂泉聲應嘈嘈接食鳥入
手食罷仍翔翽靈異難亶述一二傳無諂從子故鄉來短
衣縛襪禡迎之返黃海卓錫觀雲濤中途與相約歸可語
爾曹五日當過我相待畱濁醪如期眾畢集語意悲且豪
長歌以當哭歌旨擬楚騷歌罷起如室眾意皆驚怪排闥
入相視跌坐衣垂縑呼之已圓寂是日風怒饕掛壁何所
有血汗雷戰袍始知西來旨成佛不放刀樸實得頭地可
與羣魔塵低眉與努目一理事不勞感激壯士心聞者皆

悲號曾傳瘞塔所卽在茲山岸萬索不可得但見狐鼠嗅
嗟嗟長虹氣深閉林樵慘空山一俯仰薦爾無溪毛

別松上人

千峯跌坐處而我一相尋了了解人意空空入道心觸扉
知虎脊震榻是龍吟相失名山去塵緣愧我深

池陽寫望

池陽山水窟石城鬱崇蔭濱江慣戎馬下瀨多艨艟九派
作過客飛破吳雲空東入緬遜國西上披雄風我昔倦過
之浪卷無畱蹤冰霜積彌抱寒暑感鬱中復此枉浦棹遲
理高齋桐九子想費隱陵陽羨竇沖服食未能遂名理亮
可窮弋人視藪澤焉測冥飛鴻

池陽杜牧祠

登徒好色馬卿消黃絹清歌響未遙我讀先生燕將錄鬢
絲禪榻太無聊

風光秋浦占江南小隊行春駐錦驂只惜數年賢刺史卻
畱餘種媚朱三

秋浦懷李白

爲愛池魚美停車又幾時如何我行處每見爾題詩花發
清溪館苔荒苦竹祠青天明月在何處不相思

寄懷顧文子

縱酒酣嬉日分明擬向禽半因行路苦一阻愛山心以我
營巢拙憐君八世深惟將小山桂珍護待重尋

寫懷

望古心長入世疎魯戈難返歲云徂好名尙有無窮世力
學真愁不盡書華思半經消月露綺懷微懶註蟲魚如何
辛苦爲詩後轉盼前人總不如

昭明太子祠

高費出林阜云祀蕭德施相傳昔經此食魚而美之池乃
以得名今以魚薦祠父老沿此說真謬且勿稽我思青宮
賢皎皎玉雪姿溫恭出至性聰徹秉夙資豈惟藝林鑑斯
文仰在茲木鷺乃遭謗憂患天年移嗟嗟明哲嗣天豈歸
練兒畱待短狐輩覆滅蘭陵基臺城及元圃荒址無人知
此閒緬遺躅千載馨香貽簫鼓集材賽可笑亦可思日暮

人四散水風吹滿旗

池口寫望

年時泊池口未上卸帆亭風水如前宿雲山感再經波流
五溪合天接九華清明發重尋勝扁舟未可停

池陽雜詩

弔古憂生蒼莽開識舟亭畔此躋攀江湖白入三更夢吳
楚青爭兩岸山帝子魂歸高閣聳侍中血汗斷磯殷無愁
只有清溪水緩載菱歌日暮還

苦雨

江南本雨產江上更多風霧黯梅根治寒侵箬葉篷沙蟲
緣樹上洲鳥浴溪通日日愁凝望鄉書滯遠筒

邵一雲自江上歸餘姚

去年紅藥翻階時誦君曲江新賦詩文人海內手加額我
曹讀書宜勉之景星祥鳳一燦爛幾日聞君已投散生平
絕少御李緣亦向空山仁長歎江南山水天下聞君昨來
看山中雲山因君至出生面我亦因山得識君六經泥蟠
久丁厄奇書二酉不可覓蠹魚躍出秦灰來一髮千鈞著
書責遊山讀書歲月寬天意待君殊未慳玉堂回首付餘
子我爲扼腕君開顏蓬累經風未能住日夕同馳陌頭路
籃輿前後苦哦聲道上兒童笑相覷爲言昔別春明門道
旁送者無一人朗吟襍被上車去衣上薄汗長安塵歸來
浣向姚江浦江水一清猶似許四明濃翠撲人來從此攤

書作山主未能無別送將行此去名山信有靈下風傾耳
聽消息倘爲蒼生一動情

齊山

山形如踞虎下就清溪飲嶂奇落波光古院壓其頰客來
翠微亭沿山水淄淄紆徑入幽峭五月寒已甚雲根極盤
礴挾我快蹕蹀遍崖多銘鏤剝膚山應瘦日光眩苔色欲
讀不可審緬昔賢刺史文彩爛雲錦飛泉響石閒日日對
高枕山乃因人名餘韻勞結恁望江躋其巔長風吹懍懍
那得此巨流一瀉作墨瀦瀦寫山川奇後見皆斂衽

望華亭

日晡攜酒上危亭亭外雲巒接杳冥送客五溪聲八座邀

人九子翠依櫺山因當路名增重客到憑欄眼已青多少
征夫掉頭去獨將顏色助山靈

發一宿菴

曾聞絕頂接天梯幾疊烟嵐望已迷得意總忘山遠近但
行休問路東西飄蕭洞氣成飛雨冥漠丹根護紫泥常自
笑人巖畔月有山如此不幽棲

遊九華山放歌

昔行江上望峯峩船頭撫髀復雀躍向山手指十幅篷可
憐風利不得泊當時迎送百里餘了了望見高真居如何
今日及山麓雲塞反使山有無平岡衍阜經略盡路險心
知入佳境千尋未上氣已吞一步猶餘力加猛琅玕芝肉

夾道生奇峯削壁森成城疑神疑鬼呼欲出至竟但可以
石名半山尚有雲漫白絕頂空青春開闢雲來攃壑如有
聲雲去翻空已無跡此時望江江渺然鷺毛一白粘遙天
時移境換迭相望心空股栗神魂遷新羅老衲浮海至一
千年來占山氣騎鯨主簿跡亦畱仙佛爭靈有興替朝鐘
暮鼓聲殷雷翠微光薄金碧堆只有青蓮讀書屋至今基
址荒蒼苔才人身後偏蕭索有句通神不驚俗誰知舉筆
點竄閒已使名山擅名曰天臺一號誰分更俗分山之
半爲天臺我
欲削之言苦輕世無其人山亦晦山意待我如含情峰雖
呼九析有百齒蒼將開手生壁銀河倒掛淥水來碎滲翁
翁碧虛色混茫陸海無津涯無何有鄉真我家風吹離地

倘尺五著手便可捫匏瓜更令海水添一線此山便與蓬
萊見誰教根植塵寰中時復尋常出真面有幸不幸何足
云下界蠻觸尤紛紛我雖置身得高處俛視尚有雲中君
自有此山遊幾輩幸及登臨百年內且可聽吹子晉笙不
須更灑羊公淚

山樓夜起

松根綠蘿牢結屋屋外蕭蕭響深竹竹梢千疊萬疊山一
一風聲起空谷金沙老僧何處尋曷不邀至談夜深夜深
獨抱嵐氣宿有夢那得離孤衾

夜宿中峯和洪稚存

僧宇結巖罅一院百其級到門白蝠飛窺火蒼鼠立坐久

百谷陰凜冽破窗入流梵帶雨沈潛蚪斂聲集塔然面壁
臥精驚雷電及一靜息百勞隨身賸呼吸到耳稍猿呼入
夢或樵揖飯香腸吼聲寒退膚平粒了見峯壓檐萬翠成
一溼避世此致佳何異百蟲蟄欣然語緇衣竹閣勤補葺
他年借石牀今方作遊急

題黃荆榻寺壁

接引禪關古道隣一宵借榻亦前因鐘聲只和車前鐸鉢
水難清陌上塵題壁故人誰待我壁有岳
伸子詩視塗老僕苦催
人雲山如畫人如織未必空王不愴神

汪孝廉

輝祖

雙節母詩

五絃不同音肅殺主商羽一彈傷我心傾聽淚如雨問其
何能爲是音爲其兩絃同一心鼂看離鸞莫別鵠飛飛忽
化雙冤禽冤禽日銜南山石深深海水填不得石兮不爛
海不枯那不長出紅珊瑚貢之玉堂天下無

客齋偶成

到處蝸廬感滯淹曉涼差喜失朱炎一牀故紙風聲急半
榻虛塵日影遲水部窮烏空有賦長沙野鳥不須占轉窗
漸及槐陰午好整浮生付黑甜

夜起

憂本難忘念詎蠲寶刀閒拍未成眠君平與世原交棄叔
夜于仙已絕緣入夢敢忘舟在壑浮名拌換酒如泉祖郎
自愛中宵舞不爲聞雞要著鞭

兩當軒集卷第五

兩當軒集卷第六

武進黃景仁著

古近體詩六十一首

宣城雜詩

興闌罷飛酌延眺北郭外謝公送客處閒雲捲冠蓋水入
西江流山與淮南對聚散成古今此意幾人會日暮清吹
來天空響遙籟

古有陵陽子乘龍入雲嶠安得百丈絲續此碧溪釣溪水
清若鑑頽顏怯孤照藥餌詎可干躁進引心燒不見魚服
訴亦使豫且笑得失皆等閒束身任馳曜

溪山信紛鬱文藻昔已滿皆云內史賢結邀青霞伴雙旌

夾五馬玉簫兼象管隨風睽清遊流韻諧咸瑄如何逮我
來音塵杳悽斷青草一尺長下沒功曹館秋蝶烟際飛宵
螢雨餘散感此行路歌促節不能緩

飛樓湧疊嶂迴麓明迴沙一酌宛溪水再詠宣城花鎮重
有亭埃堞古無鉅筵棲泊偶有歎曠覽能無誇苦愛敬亭
色淹旬未思家寄言二三子歲晚方脂車

重至當塗懷稚存

三閭瓦屋廡東頭與爾曾爲晏歲畱鶴張猿啼新別恨塵
封蛛網再來愁關心几榻消前劫滿眼雲山感舊遊絕憶
絲蓴滲鹽豉東歸空羨季鷹舟

相對常爲嘆暗行更經離索想生平六棺未葬悲元振稚存

歸營一刺空磨歎禰衡忍使桑榆乖色養誤將書劍換浮
名乾坤祇許閒鷗鷺與話烟波浩蕩情

大造

大造視羣生各如抱中兒非因果哀樂亦自爲笑啼阿保
縱解意那得無啼時當飢幸一飽心已不在飢誰知登崇
山足土固不離豪士或見此秋氣旋乘之觸物感斯集不
知何事悲恹恹百年盡俛首歸汙泥精氣生已洩那有魂
相隨矯枉而過正亦受前賢嗤我慕魯仲連閱世同兒嬉
見首不見尾焉能贊一辭

烈士行

諧樂無疾奏清讌無急觴若論壯士志瀕洞爲中腸剖擲

當君前中有一寸霜擊衣呼豫讓向風刈田光交者不利
身差勝輕薄行微軀不自惜破膽與誰嘗

晚涼

晚涼庭院好風葉落先秋感爾蕭疏意添余浩蕩愁披襟
祛俗吏搖扇卻平頭美滿今宵夢真輕萬戶侯

答和維衍二首

連旬憶君得君問書意不盡繼以詩邇來吾子才大進但
怪胡爾憤激爲冬烘一言進左右吾輩窮薄命所司風雲
月露苦刻鏤元氣未必無虧遺從來才人感秋氣如豆合
黃素染緇賦才如此窮尙爾此意未薄宜深思比聞亦作
湖海計此我覆轍當鑒之鄉閭媿薄百無戀詎忘親鬢霜

絲絲吹簫乞子行處有幸者得飽否尙飢年時我實深味
此若復勸駕吾誰欺雖然窮蹙豈了事言之淚下如綆糜
我行繞江百向背未得徑渡波滔滔宣州十日解鞍臥又
聽萬綠喧青蜩當頭作劇趙盾日六十晝刻何迢迢知君
憐我有羸疾那禁觸熱如燂魚濱江瘴溼更多厲遍體瘡
潰流黃膏聞君亦復有同病當覓靜處勤爬搔不然世多
嗜痂癖靈休膚剝愁難逃目前文戰有小敵好用全力前
相廛舊穿楊葉更一試雖不得仙亦足豪莫言創瘢已竟
體便泯得失如秋毫秋風轉眼蘇客困忍耐半月炎威敵
百端瑣碎不堪說便望寄書慰鬱陶高秋恐我渡江去此
時音問愁寥寥

憶昔篇和趙味辛

鼉吟憶昔篇憶昔慘行客天旋海水運六螭無停策但聞
古來人言言悲在昔所過已異時所閱已陳迹莫吟憶昔
篇達旦長歎吁居者念在行行者不得居夜夢入飛谷冰
炭同一爐何由一丸泥換此五色珠漫漫事長宴不聞晨
啼烏烏啼東方曙徘徊睠長路人非鹿豕羣那得長歡聚
秋霜畏蘭摧歲寒愁桂蠹仰視若木光周天幾頽注吟吟
憶昔篇憶昔知君心雲閒落鸞鵲海上聞風琴出山念小
草出谷憐幽禽廣以及時樂勉以惜寸陰豈惟感在昔流
眷乃及今憶昔復憶昔百年不盈瞬豈有金如山能鑄鏡
中鬢且回魯陽戈且挽姬滿駿闔闔轉眼開排闥望君進

倘念蒿萊人更枉霞間訊

宛溪行送稚存歸里

宛溪之水流湯湯夾岸古木陰清蒼澄潭激瀨數十里分
明洗出詩人腸景梅亭子相望出都官祠墓俱荒涼當年
詩老飢欲死捐剝祿命爲文章七百年來無此作山川氣
焰爲摧藏眼中人乃見吾子上下千古俱低昂望氣已欲
三舍避餘力猶作干夫強古人但恨不我見那與世論爭
蝸蟾因之亦復得窮理九命之說非荒唐終知鱗鬣合變
化泥沙倔強不肯僵蛟螭糾結走字底騏驥束縛趨路旁
對君自顧啞然笑只合披髮爲佯狂陰何齊譽忝竊據江
蔡同郡慙顏行半年僭作楚尾客塵土面目如我黃名山

夜雨幸相共百年此景奚能忘昨來一月宛陵住此都大好山水鄉君今忽忽有歸計縱爾小別愁茫茫如形逐影忽相失歸夢亦與征鴻翔清秋倚棹待君至高唱和入江天長

入市

生平入市視常仰譴訶往往愁官長喧填騶從除道來呼聲直欲緣雲上居者罷市行者停一一低欄過旌仗人多路窄卒難避頓觸淒涼幼時事蓬頭敝履書塾歸正值天寒凍消地道逢中丞鹵簿來失足墮溝顏死灰吞聲飲氣哭不得歸語阿母肝腸摧卽今依然窮乞骨那得車前入騶列此身憔悴甘已矣萬一宜酬親苦節前途且語車中

人但逢小兒莫怒嗔家中各有堂上親更指雙眼勤物色此輩頭角難爲馴

復得維衍書

不因離別苦那見舊交真老母傳言切啼兒入抱馴時君過問家書開官閣夜花寄草堂春等是端憂者輸君耐久貧連宵頻見夢呼我病瞿曇生計關商確詩歌共苦甘去魂迷海樹思淚滿江潭相望年如綺離傷果不堪

寄蔣耘莊

蹤跡吟場半載同水西樓下別愔愔清狂好占溪頭月寥落應憐澤畔鴻屐齒青餘三逕草淚珠紅入半江楓酒痕檢點春衫在聚散渾疑一醉中

臥病宣城秋將至矣偶憶舊遊感而有作

憶昨湖口扁舟回雪山九道流皚皚半生哀樂一陶寫仍
向空牆嘶病馬西南枉欲窮天行撥墨惟盈斗分野謝公
樓頭疊嶂橫六月臥聽寒蟲鳴雖云掩閣萬山裏耳邊隱
隱風濤聲夏雲飄飄卷殘岫遼落長天映虛竇聽風在樹
意已涼看月出嶺光如晝眼前恣意惟晏眠俯仰隨身屋
數椽聊將破浪乘風意寫入鐘鳴落葉篇

雜詩

軒屏夕涼動帷幙微風吹羣動本有息靜者心自知迎涼
戀前除豫恐秋氣淒疏聲已在樹顧影猶榮滋萬物有同
命先見爲之悲華心且未歇持此當贈誰

此時

此時持事至太不近人情新婦求工苦侏儒得飽榮如山
文乍積似雪鬢將成抱膝聊長歎猶能詠洛生

隴頭行贈王大之關中

隴坻之坂坂九回青天九折盤崔巍秦川萬里一回首歌
聲日暮肝腸摧何人作歌心斷絕遊子魂消古離別隴頭
水作東西流隴上人爲死生訣試問此情深幾許石上車
輪窪尺五人間何處無關山盡道無如此行苦折斷珊瑚
七寶鞭未曾回首只行前生來不解消魂別愧爾關西俠
少年

藥渣魚

卽琴
高魚

集六

六

琴溪春水唾凝片小魚鉞頭刺波面溪旁居人網及時不
用絲繩需尺絹盛來入盞水不分兩目黑星微可辨水鮮
且可助茗具別張旗鼓供舌戰涇縣人謂茶魚王餘白小精不
如可憐千頭未盈嚙相傳琴高跨鯉升藥鼎傾渣入波變
先天本借金石精餘生乃比糟粕賤後時不得相隨仙雲
中雞犬徒相羨微名累爾及鎗鼎所喜流傳藝林遍桃花
水過蒲蔣深及早消形付波練

詠史

洛陽賈亦奇男子東海人非眇丈夫任爾雄心包六合死
生無那受人愚
華陰怪語甫驚傳惡夢俄成滄海邊怨毒不分人鬼氣欲

從何處覓神仙

暮夜長鯨動玉鱗蘭池盜氣已無秦成名不及韓亡客絕

勝荆軻一傳人

姜貞毅墓

前代黃門塚土壘敬亭雲淨想鬚眉勳餘樂布懸頭下歸
後蘇卿告廟時君父之閒心有諾滄桑而後爾何辭昨從
念祖堂邊過故老流傳尙有悲

回首橋陵涕淚渾艱難於此斂羈魂起家忠義田橫島蒿
目興亡伍相門地下鐵衣新鬼戍生前抔土故君恩松楸
幾點斜陽入絕似朝衫棒血痕

七月八日夜雨偶成

今年洗車雨應作洗塵看豈是分襟淚猶憐隔歲歡星光
添黯慘漢影助迷漫不寐懷兒女幽堂一夜寒

初九夜

拉雜雨聲收迢遙入夜愁送涼孤月皎得氣早蟲秋簞冷
無人院箏殘何處樓紅牆高尺五盼斷玉繩流

秋夜

絡緯啼歇疏梧烟露華一白涼無邊纖雲微蕩月沈海列
宿亂搖風滿天誰人一聲歌子夜尋聲宛轉空臺榭聲長
聲短雞續鳴曙色冷光相激射

烏棲曲

老烏守巢啼日暮雖不歸羽翼各自有知他何處飛

思舊篇

并序

戊子己丑閒屢客武林偕同人宴游吳山酒樓蹤
跡居多酣嬉之樂彼一時也別來聞座中吳門蔣
思睿天而勞濂叔亦卒於官感而賦此

五年浪跡辭吳山山中猿鶴笑我頑追陪盡屬嵇阮侶別
來霜雪凋朱顏別後飄零斷書問怪事驚傳半疑信勞殂
蔣天須與閒一作陳屍一行殞蔣生年紀二十餘兀兀抱
經常守株要離塚畔一抔土誰信此才堪著書勞年四十
遇尤舛水部一官名甫顯殘膏一爍爛旋收始歎文人得
天淺蘭蕙兩兩遭風吹身後淒涼更可悲一生伯道傷無
嗣四壁相如尚有妻青山賸稿半零落土花剝蝕無人知

嗟我猶慙隻雞奠脉脉淚痕空被面虛星耿耿夜臺長魂
魄何曾夢中見反思置酒吳山頭淋漓醉墨揮滿樓我時
抱病將遠遊公等苦爲狂奴憂誰知揮手數年事而皆反
眞吾尙畱我畱幾隻更行役游地追思徒慙慙何日同張
竹下琴不堪更聽鄰家笛達觀我昔思莊蒙曾言死勝南
面榮又聞栗里感栢下爲歡急急深杯傾昔人持論若矛
盾乃今始得觀其平以生哭死死可惜無此一哭死亦得
後先相送本斯須相看那得忘憂戚顧影臨風自歎吁故
人風葉共蕭疏若知鬼伯催人急好覓生存舊酒壚

雜感四首

抑情無計總飛揚忽忽行迷坐若忘遁擬鑿坯因骨傲吟
還帶索爲愁長聽猿詎止三聲淚繞指眞成百鍊鋼自傲
一嘔休示客恐將冰炭置人腸

歲歲吹簫江上城西園桃梗託浮生馬因識路眞疲路蟬
到吞聲尙有聲長鋏依人遊未已短衣射虎氣難平劇憐
對酒聽歌夜絕似中年以後情

鳶肩火色負輪囷臣壯何曾不若人文尙有光眞怪石足
如可析是勞薪但工飲啖猶能活尙有琴書且未貧芳草
滿江容我采此生端合附靈均

似綺年華指一彈世途惟覺醉鄉寬三生難化心成石九
死空嘗膽作丸出郭病軀愁直視登高短髮愧旁觀升沈
不用君平卜已辦秋江一釣竿

十四夜歌宴

歌場坐穩舞筵成
小部霓裳按奏清
半黍欲飄風更約
三絃初定月無聲
青春張緒臨風態
白髮何慙被酒情
識曲羣公敢多讓
不妨明日有狂名

睡醒

不知明月生照窗
如白曉霜冷夜衾
單秋池夢空草

橫江阻風

洲若香消岸荻秋
離人虛繫五更舟
曉來誰唱橫江曲
惡浪無情也白頭

重泊舟青山下

名山不我拒
一再逢
諸塗中隔千里
道相見仍如初
伊昔

登絕巘欲攬江天圖
豐堂冠山築支羽羣靈趨
下盼吳楚交雲脚垂模糊
危樓一信宿往境不可摹
昨來五兩輕吹送茲山隅
停槩岸莎積繫纜崖石枯
有徑不能上 伫望延須臾
風日既暄美雲木交清疏
文人六朝後彩筆流其腴
江山闊遠開古意相與俱
涉境異今昔會理亦迴殊
焉得攜謝守永卜山中居

渡青弋江

羣山如接髻青青
度陵陽山平水界途一葦
茲用航錦石燦沙屑
晴洲鬱蘭芳甫聆棹謳
響勞躅渺已忘馬目眩
水色客鬢愁波光人馬
一時渡去路如川長

山中

忘山意已超有我心猶滯鳥語落檐花飄來著襟袂

重過青陽

車檐卷朝日遙見九子山山容昔相識草草曾躋坂竟辜
棲真願稍諳觸熱顏一髮塵累縛堅如繫天閑元闢古蕩
闢不至人自頑蹉跎百歲中沒齒皆等閒驅車過之去何
時復來還

江館

賓館夢闌珊征程次第凋新愁傾栢葉舊約撫刀環江上
千帆雨淮南一桁山誰憐衰柳色憔悴不勝攀

渡江之皖城

舸舡輕一葉橫渡正驚風去岸辭羅刹回帆掛皖公九江

淮壘接一柱海門通尙想周公瑾當年作鎮雄

安慶客舍

月斜東壁影虛龕枕簟清秋夢正酣一樣夢醒聽絡緯今
宵江北昨江南

余忠宣祠

至正國步何倉皇將軍許國軀堂堂生爲孝寬易易耳一
死直是張睢陽妖星十丈橫軫翼兩淮東西已歸賊龍舒
重鎮實彈丸賊畏將軍至傾國裹瘡前後數十戰漸見全
城氣皆墨蜂屯蟻聚當平明巷戰殺賊揮短兵賊酋大呼
宜得生生當官汝付汝城將軍戟手指賊語死爲厲鬼當
殺汝青萍三尺水一泓去此一步無死所將軍已死殉合

門紛紛部曲呼其羣曰余將軍死死君我輩何忍辜將軍
從而死者千餘人此千人者驅可戰寧死相從不生叛生
得死力死得心將軍才大空古今用之乃副宣慰使國是
披猖可知矣斗大城猶守六年百戰身經中三矢真人濠
濮提劍來掃清六合浮雲開崇祠遣祭議隆謚碧血靜掩
蓬蒿堆靈風何事尙含怒應爲堦前老臣素嗚呼元亡尙
有人盡如將軍元可存嗚呼安得如將軍

縱陽

縱陽歌盡水連天漢武旌旗在眼前草木似聞呼萬歲魚
龍何處徙重淵舳艫千里江雲散金碧三泉隧道遷只有
射蛟臺畔立雄風猶爲想當年

皖城

古驛同安白浪邊東南形勢海關連風雲舊護龍潛地壁
壘全增馬渡年斜日埃兵多被酒清時洲渚半成田回頭
城郭晴如畫十里牽江是爨烟

貴游行

貴游誰家子驄馬驕馳騁朝入銅龍樓暮歸紫薇省盛滿
不自持惡風吹夢醒照鏡鏡無頭披衣衣絕領可憐西市
中輦容尙修整白首誰同歸蕭蕭看日影生存骨髓枯濺
血不盈頸當伊作使時千軍失其猛眼見被收日曳之勞
尺綆觀者徒咨嗟誰與發深警

皖口

皖口征檣滿宜城晚渡稀蕭蕭候風色寂寂換涼衣雨際
嘗沙狗潮頭望海豨自來諳水宿人景兩依依

道中秋分

萬態深秋去不窮客程常背伯勞東殘星水冷魚龍夜獨
雁天高闖闖風瘦馬羸童行得得高原古木聽空空欲知
道路看人意五度清霜壓斷蓬

歸燕曲

玉露零堦葉飄井巢燕差池去無影別路三千紫塞長秋
風一夜烏衣冷可憐欲別更徘徊暮氣繁華眼倦開易主
樓臺常似夢依人心事總如灰珠簾十二斜陽下淒涼幾
閱流紅卸昔日拋花散綺筵此時掠草辭歌榭海國回頭

霧百重可應魂戀舊房櫳玉京臂冷紅絲斷神女釵歸錦
合空亦有江南未歸客年年社日曾相識故家子弟半飄
零蘆花滿地頭俱白朱雀航邊伴侶稀鬱金堂上故巢非
拋殘一樣新團扇辛苦三春舊舞衣感恩幾輩同關盼忍
待明年更相見一任泥拋落月梁那堪門掩無人院伯勞
東去雁南來百遍相呼誓不回天空自有低飛處不是同
心莫浪猜

長風沙行

朝望長風沙夕望長風沙郎書前日到早晚下三巴巴歌
易腸斷漢女嬌如花郎挾千金貲何如早還家去時明月
珠團團入郎手郎歸向郎索猶在懷中否潯陽下湓浦湓

浦多風潮將毋聽商婦夜夜鳴檀槽江狶舞斯風焦明集
斯雨郎行慣水程不用妾傳語低頭拜石尤無爲阻歸舟
歸舟望不見日日風沙愁郎言雖反覆凝盼常如此昨夢
芙蓉花飄零落江水

主客行

杯來何遲杯來何遲主人見之主人笑相告匪杯之遲而
飲之速客起語主人主人切勿生怒嗔人生處世上奄忽
如浮塵東家郎西家女晨考鐘夕伐鼓吾楚歌若楚舞人
如龍騎如虎朝紅顏暮黃土朝紅塵暮白雨人生至此云
胡不傷今夕何夕登君之堂登君之堂飲君酒願君子孫
纍纍印若若綬客行千觴主人壽

不得藉二書

漸寒江北地况奈晚秋何菰米沈雲盡蘆花作雪多因君
阻消息歎我滯風波可念衣單客天涯五字磨

登大觀亭

山色殊春秋江聲無晝夜佳哉皖公城山水莽雄跨障擁
淮淝高勢與荆襄亞崇臺得壯觀迎睫足吁訝沿堤十萬
戶蜃氣相激射飛浪過檐頭轟濤聞枕罇回首皖公色潑
翠滿楹榭炊烟自成雲不與江流瀉龍爲徹夜吟鶴或橫
江化水寒沙淨閒茫茫感代謝得增懷伯符升城緬興霸
人雄及地勝憑陵不相下驚焱卷旌旗寒雲收叱咤徒令
懷古心淹此趨途駕

江上曉發

木蓮花發卸紅衣，夾岸秋江碧四圍。
帆色正迎鴻雁至，客程常背鷓鴣飛。
袖招獵獵江風滿，鬢惹濛濛水霧霏。
多少閒情獨凝眺，凌波羅襪想依稀。

宿練潭用王文成韻

地因文成過此有澄潭淨如練之句得名

落日銜孤峰，餘彩散遐甸。
裊裊川上霞，潑洞映潭練。
環溪有十室，初燈影成片。
明沙積夜光，菰米足秋薦。
我來坐空館，流翫樂幽便。
呼燈照塵壁，懷曩倏驚羨。
當年荒僻區，曾識巨大面。
愛此澄潭佳，清詠百鍾鍊。
大名宇宙垂，餘力吟弄擅。
落落鴻雪蹤，搜剔待來彥。
勲業夫何常，成者天下見。
輾轉深宵中，淚下零如霰。

白沙嶺

嶺頭過征車，來往日萬計。
但碾石成沙，難平山作地。
塵頭飛起昏一山，日暮不見飛鳥還。
一邱一壑有佳處，何事作山當道路。

桐城懷方仲履昆季

曾於官廨識機雲，感我風情似薄醺。
到枕岳鐘晨共被捲，簾湘月夜添薰。
冶遊何處青驄騎，醉墨猶存白練裙。
鎮日龍眠山翠裏，獨吟秋樹不逢君。

兩當軒集卷第六

兩當軒集卷第七

武進黃景仁著

古近體詩五十八首

舒城道中九日懷左二

茱萸簪罷雁初聞回首江東阻斷雲
短短白衣辭故國蕭蕭破帽背斜曛
本無兄弟同佳節略有知交更離羣
桑落滿杯傾不得青山紅樹渺思君

車中雜成

荒岡愁攬轡衰柳雁行邊石角疑掀地
雲心欲竟天世途看馬耳骨相負鳶肩
行路多憔悴無爲獨黯然
新路如人面看來總不同轉山皆刮目
得徑欲生風秋潦

寒逾縮高原燒更空驪驪知我者詎肯老塵中

早發

十里背高城猶聞擊柝聲馬嘶回鳥夢人語先鷄鳴樹擁
千堆黑沙浮一道明殷勤望殘月愁絕此宵征

卽目

遙程無計可停軒暮景蒼蒼野色繁破廟半將茅補屋秋
墳多插紙爲幡似曾見影人投磧畧不聞聲鳥下原今夕
定知何處宿暝天漠漠對忘言

車中口占

上車多睡魔輪喧心更寂清景紛相迎好句倏難覓旋得
亦旋忘雲烟付生滅轉念林泉佳應有幽人宅對面或相

違而况阻朝夕長吟招隱篇誰識車中客

卽事

野店黃茅宿雨收夕陽帽影兩悠悠瓦盆酒熟香初透土
壁蟲寒語漸休小草於人有同命遠山對我各驚秋奮飛
常恨身無翼何事林鳥亦白頭

空館

寂寞誰家院憑來客夢家吟聲振高閣落得瓦松花

望霍山

漢武登封處千巖有勒銘東南天首柱風雨岳移靈雲接
蒼梧白峯盤六蓼青銅鐘古文字可許叩幽扃

夜夢故人

半是離鄉半夢鄉西風捲葉雨鳴廊雲將隻影穿關塞月
與平生到屋梁珍重贈言多未解斯須攜手亦何妨覺來
枕上無乾處髣髴空簾去路長

春風怨

雲翹舞徹椒花筵東風昨夜來無邊吹成大地可憐色都
道看春宜少年此時多少繁華地此時無限臨春思絳綃
弟子平陽家綠幘廚人館陶第桂館銅鋪四望通濃裝治
服出當風題來芍藥千花妒顧罷胭脂一部空沈沈萬戶
歌鐘動春風未醒紅顏夢照鏡都誇城北徐窺臣總道牆
東宋亦有空閨黯自傷登樓終日向凝妝圖中粉膩千行
淚錦上文迴一寸腸關山蕩子空回首辛苦邊頭亦何有

歲歲常悲死別離年年不見春楊柳江南思客更傷神望
遠愁遮日暮塵啼鶯柱自思公子香草何曾見美人鶯飛
草長誰爲主渺渺春江作歌苦一夜飄殘吳苑花五更捲
散巫峯雨可憐東風作意吹可憐春去不勝悲人間無數
閒哀樂若問春風總得知

英布墓

奮跡驪山事已虛一生刑王意何如去畱楚漢興亡際倔
強韓彭斧鑕餘下計已教歸掌握間行生悔爲驅除淮南
尚有遺封在寂寞誰爲弔廢墟

春閨怨

昔倚新妝好羞教女伴憐嫁期纔十五別路已三千字盡

秦川錦膠枯蜀國絃祗今空自愛春至一年年

獨酌感懷

昔讀遊俠傳不恥輕薄名樛蒲與六博世事浮雲輕逢人
獨意氣出語好聰明自謂六合寬掉臂隨游行頽畀乃積
久憂疹來縱橫萬事悔少作念之傷人情淺識關洛彥薄
假吳楚聲元黃不與析悔吝誰爲呈顛狂睠儕輩稍稍乖
前盟各欲自爲計夙昔非其誠飄然舍之去氣結心怛怛
麴蘖腐腸物吾乃託以生暴棄豈自甘舍此亦無成崦嵫
沒西景回薄無畱精天地方肅殺冰雪將崢嶸有酒儻不
飲明日誰逢迎

關山月

關門掛璧月吹角登戍樓此時邊將樂連城倚霜鉤名王
將繫頸都護欲封侯懸弓開寶帳置酒擁貂裘蠻君雜座
舞羌女臨觴謳那知閨中婦淚掩金屏秋萬戶流砧思千
城落雁愁願將一片影移照海西頭

對食

居爲腐儒愁素飧閒日思飲思茹葷朝將染指誰氏鼎暮
擬獵酒何人門比來郇廚得緣入腥羶苦壓腸胃昏偶憶
吳酸故鄉味不覺涎流滿襟袂醋芹堆盤一寸長鹹蕪積
甕半年計將來可洗肥芋腸無奈郵筒遠難致一生食籍
知幾何欲問司籍防遭訶雞豬魚蒜逢便喫鼯鼠那得乾
黃河

鼠

無心看黠鼠竄竊滿虛幃爾自多陰相人非有殺機呼羣
聲穀穀隔燭影淒淒縱爾分餘粟何曾便苦飢

得蔣良卿書知客池陽卻寄并訂歲杪同歸

比年同學寡生色一一來作江干客昔時寄我當歸人今
亦苦被飢寒迫拔劍寧與陽侯爭肯及牖鬼談生平採山
探海各有路學亦何必東家成君家中表穉存吾好友兩年
官閣聯杯酒擁鼻正賦懷君詩一封書來各搔首識舟亭
北池口東其上九子饒雲峯君來才境有真敵沐浴山澗
風江風遊同一方居共里作達天涯望吾子命駕猶懸兩
地心飲馬只共一江水晨颿吹警客苦悲投箋試問東歸

期歸舟風雪歲云暮有心相待盧之漪

渡淮

岸遠揚州出天空水氣多雲中落桐栢日下共江河花月
愁成海魚龍夜起波錦帆天子去何處覓清歌

潁口

賓鴻迎已盡而我去悠悠清潁霜前落長淮樹杪浮客魂
迷下蔡地脉逼中州漸覺衣塵積休凝直北眸

舟次潁上

登臚不幾日忽落淮之西水汎性稍諳霜落望轉迷壽陽
樹綿邈潁尾波滌漸蒲柳披已盡紛錯空烟堤渴來汲水
飲水濁一斗泥物華感徂落風土悲難齊戀月入遙昔聽

歌異前溪賞心不可卽行矣常含悽

舟行卽目

霧鬢烟鬟水上頭
蓀橈斜倚蓼花洲
眼波欲逐川流去
眉翠常含風色愁
細語可容檣燕寄
閒情空望佩珠投
分飛八字帆何駛
那得前途一並舟

潁州西湖

我來潁尾已良月
痛飲不及西湖秋
荒蒲萎蔓風斷續
烟曳白水差差浮
醉翁髯翁去相踵
斷碑零翰荒難求
昔時賦詩傳盛事
文獻相續誇雄州
逢人只道此湖好
簿書琴酒儕魚鷗
竹西歌吹愛莫奪
六橋橫絕難爭優
人疑古人嗜好癖
此論迂矣同刻舟
達人醯雞視身世
興會偶寄思

歸休終年娛老得地足
邱壑何必常盈眸
坡公況是老龍象
大千起滅同浮漚
此閒詎肯較鉅細
亦如陽羨堪終留
聚星堂客久星散
此湖半亦更田疇
秋來往往積淫潦
高處得得驅耕牛
若教麻姑海上見
卽此亦是滄桑流
柳亭葵社共闌滅
令人一一悲山邱
吾曹淪落偶流寓
姓名寂寞誰相收
一杯公等起今日
更放何人出一頭

潁州南樓

跨野飛樓矗登城
起浩歌風生淮甸
夕雲壓汝陰多淺澤
魚辭餌空天鳥避羅
飛揚無限意奈此暮途何

順昌劉武穆祠

將軍節制趨東京
正值北軍初敗盟
妖風半道拔主帳
投

箸急起驅兼程鐵浮圖來驟如雨一軍倉皇夜叉舞卻行
一步辜國恩女兒磨刀男負土雲愁天黑雷電驚一百小
兒吹鼙聲白袍太子齒欲裂索靴上馬來趨城長虹五道
飲河下肉山自來填曠野平時人欺八字軍今日乃破拐
子馬危城決捷百出奇姓名奚止驚兒啼不教長驅得留
鎮邊馬誰敢窺淮西柘臯瓜步戰未已力疾猶聞拍刀起
中興宿將更何人氣盡都亭看北使悲風蕭蕭潁水湄魂
來戰處神鴉隨莫傷老去壯心負鄂國英雄更可悲

平輿行

昨滯汝南駕云訪平輿淵雲天極遼廓龍去今千年名譽
早未立仗劒懷昔賢澤蒲昧朝日澗松翳晨烟在世一奄

忽草木同推遷游揚非聖法此誼今已捐蒼茫振孤策就
宿何林邊

昭靈宮

在潁上東坡詩一水環帶昭靈宮是也

張公罷合宣城時一門皆龍人不知焦臺唾手起宮殿飛
蕤切空人不見青綃繫鬣來乖鱗隙地相借乃敢嗔空中
夜夜鬪且死五更還家喚龍子驅霆激雹鑿正酣元黃血
中斃之矢此時舉家飛上天至今廟食清潁邊呀然五穴
五雲朵一出已潤淮西田虛堂神鬼晝陰悄羅拜時來白
鬚老遠人長揖亦有求願得還家布帆好

汝南范孟博祠

登車慷慨竟何成危論俄教四海傾誰許夷齊伴歸骨尙

留李杜與爭名風流舊仰先賢傳月且翻輪後輩評門外
汝流東去急君看此水幾回清

登清潁樓

郡樓斜倚夕陽開對酒寒原似死灰併力星霜催歲去合
流汝潁抱城來採風斷自條梅始弔古言尋桑穀回舊說
茲鄉足名士如何不見使心哀

寒鴉

朔風吹城白日低登樓四望懷慘悽排空戰寂萬枯樹樹
樹上著寒鴉啼寒鴉初來半天黑同雲作陣風附翼飄蕭
散落林岡頭倪迂畫點米頭筆此鳥亦如雁隨陽哀聲前
後感詞客有枝相借羣依此無巢可投轉惻惻三兩稍集

空欄端告我日暮天且寒無衣無褐欲卒歲頓袖相對空
長嘆舊巢同輩苦相傲占得五更金井闌

曉起樓上

甫有鴉驚樹披衣洞竹樓平憐萬家夢猶壓曉雲頭獨醒
嗟何益勞生此暫休朝霞如可掬吾願訪丹邱

雜詠

海客有逐臭夢人或忘妻單慮溺一往豈伊智不齊蓄積
偶違衆羣起相訶詆誰知一世事各各行若迷化人斡真
宰無力能提撕作法笑姬且多言小宣尼積窮有難喻况
乃形氣睽惟當託莊誕俯仰同醯雞

陳平未豹變乃在委巷居貧賤不相救安用長者車恬退

匪所甘落拓計益疏藉非時命濟咫尺填溝渠齋志遂沒
地史筆何勝書誰與負物色果在風塵初買臣傲妻子斯
理堪殺軀聖論貴素位大賢有卷舒不見張仲蔚蒿萊深
閉廬

歲暮寄懷友人

短圭何促迫衆感因摧藏朔風搖天雲吹結百草霜修塗
曷云極層城各相望金石不在軀恃有懷信芳及當壯盛
日敬矣事容光

木蘭祠

替耶征戰屬蛾眉勸孝如何史筆遺一自當窗拋杼袖直
從絕塞採焉支明駝歸里驚同伴白骨填荒媿健兒樂府

歌篇今尙在誰將簫管賽神祠

題酒家壁

一杯凍面破陽春更洗盈襟萬斛塵入市馬周空骨相登
樓孫楚尙精神兒童自笑行歌客徒御兼羞失路人歸覓
傳家酒鑪去莫教風笛愴西鄰

冬日憶城東諸子

紅日當窗放白鵬鄉心猶是阻關山浮雲忽作江淮別客
淚孤懸梁楚閒狂客羊裘初在御縣人牛酒暫開顏東城
舊有消寒會幾輩依然共往還

發潁州

昨來清潁上高館歡醉厭曉風過清歌遊子愁捲簾臥聞

鈴鐸語替戾差可嫌俄來僕夫趣孤篷犯霜嚴屈指卸鞍
日畢辜已應占歡場知有散當散戚不怵悵悵逐前侶隱
隱望層檐風水引夙悵尺五沙痕添歎驚遠鴻落汲動靈
蚪潛一昔頓殊況冷煖不可兼預恐清鏡裏兩鬢堆吳鹽
舟中

一沙介枉渚阻此疾帆勢拳鷺不畏人舟行自相避已忘
身坐空但若波轉地高桅絡霞彩長袂盈水氣潏流如湘
流清絕渺迤邐去心一何長古懷曠難寄上流飲牛人或
可明吾志

淮上曉發

水聲夢語同怨幽曉來浪花齊白頭淮山一髮轉柁得向

船低昂如有求風吹五兩鷁飛疾浩歌誰識滄洲逸前途
縱有桂樹攀多恐天寒已無實

蘄口

隔灘漁父罷叩舷鴛鴦四起黃沙田殷牀鐘韻散淮樹拍
枕水聲回楚船塗山殘月落將盡蘄城夜火寒不然中宵
冰雪悄難寐苦調噉徹朝霞天

蘄口曉發

憶昨霜落停素舟皎然月映清淮流□□老兵三兩輩忍
寒擊柝沙上頭五更夢醒舟已發但見荆塗兩山相向浮
兩山鼓勢不相下急湫盤渦走其罅觸舟或是黃熊精拔
劍欲絕蒼光駕疑神疑鬼心不驚順流鼓吹天平明揚州

南岸雲樹出鍾離古國烟塵清風爲息其威水亦靜其聲
令人轉思大禹力浩蕩自逐朝宗行水自思歸我何急苦
向中流放舟入窮冬人事東去波曾無少停當奈何今宵
有酒吾當歌

陰陵

帳中餘泣尙沾巾上馬星馳數騎塵如大王言空斬將從
漁父問詎知津荒城尙竄驚弦獸大澤常多失道人見說
英靈且來往深楸月黑走青燐

夾石

東南險首江長淮限如闕淮流苦浩漫拒以山突兀禹跡
埋峰腰丁斧碎山骨水底合翠黼雲中峙金闕倒激萬丈

潭蒼兕下據窟有險人乃爭蠻觸鬪出沒一從孫曹來屢
作揚塵堀壽陽南北衝失此城勢抗神怪紛推拏英靈動
震咄當其作勢時淮服欲掀揭承平旣有年空此鎮嶢峴
詞客欣弄嘲布帆快飛越山腴發嬋娟水媚蕩沕滑雙城
落天半倒影辨窾凸人言劉安昇於此去飄忽秘跡一以
傳流羨渺難歇風利欠幽尋神遊付芒惚

塗山禹廟

鐵花已繡支祈脰閃尸罔象逃鞭鞘文命治水河精教玉
斗熨胷星冠顛夢中飲河不用爬庚辰亥豎供趨趨奚仲
挾策驅轆轤趨風白水躬曲勺元圭乃得天貺佼娶塗舊
國山嶢嶢日暮失嗣心孔恹祥狐候立風尾捎南音歌始

正不咬出門那顧兒啼嚙台桑莽莽雲氣寧斷山出脉水
納睟蟻珠吐孕璞剖胞精燄浮爍波蒸焦作貢用逐橘柚
包日月拱璧霓垂旂典瑞輯玉爭來越樂作言產兼沂巢
趨風振珮斂衽綃峩峩冠冕參閭交更攝荒邈來圻郊貫
胷長肱目或兌操蛇衣卉顏塗麴兜離傑侏聲啾啾窳窳
首龍雕題鮫或乘飛黃髮垂髻或乘騶吾駕神蛟千詭萬
狀窮撮抄各望聲教奔如鹿有不用命遭擊掙汪罔骨軸
專車拋相柳血漉穀不苞省方用代重瞳庖威爽萬劫醜
巖坳越三載會山登茅記傳兩地爭饒饒編年塚竹差不
淆辛壬癸甲史筆謙兩日生子後所嘲衆論概勿深推敲
黃熊怒氣餘咆哮驚軀鹿足驅銀泡女媧化石立地膠風

蕩日暈晴微宵宮殿相望同豁摩承塵玉座垂嶙峋松耶
柏耶蚪龍梢歲時雜沓神巫跑羅列百戲喧鐘鐃肥羊滿
控牛折炮至今熊白忌薦肴餘愴尙與人心交靈旗肅肅
風颯颯送迎曲短神無聲

夜起

詩顛酒渴動逢魔中夜悲心入寤歌尺錦才情還割截死
灰心事尙消磨魚鱗雲斷天凝黛蠹壳窗稀月逗梭深夜
燭奴相對語不知流淚是誰多

鳳陽使院

空廡經年閉初來掃棘荆飢颺驚夜火歸鳥駭書聲夢倦
淮南路心依海角城婆娑倚塵劒舞影共參橫

壽陽懷古

鐘鳴鼎食是何年
玉几金牀未肯眠
輕薄江淮多子弟
有無鷄犬亦神仙
祕函已驗更生獄
叢桂空攀正則篇
終古八公雲外立
曾將何術鑄桑田

華門俠氣有聲稱
竄竊俄誇土運乘
廁上蛾眉餘涕淚
帳前獅子早飛騰
眼看河北同灰滅
手裂淮南作社憑
詎料當塗是真敵
櫺牀悲叱竟何能

紫穀香囊白練裙
翩翩儒將掃邊氛
重名不借燒船火
奇陣何殊背水軍
亡國魚羊應共喜
戰場風鶴尙難聞
穩教了得東山局
可仗兒曹破敵勛

懸瓠重鎮嘯鶴鷗
棄甲宵奔此渡頭
羯豎竟教登玉座
儂

家從此闕金甌
北山南岸嗟何及
白馬青絲唱亦愁
借問當時誰指盜
悔令韋黯作監州

濠梁

誰道南華是僻書
眼前遺躅喚停車
傳聞莊惠臨流處
寂寞濠梁過雨餘
夢久已忘身是蝶
水清安識我非魚
平生學道無堅意
此景依然一起予

濠州雜詩

濠上浮雲氣寂寥
荒城風日晚飄蕭
地形分控東西楚
山勢猶爭南北朝
陌路塵沙顏黯淡
鄉關橘柚盼迢遙
昨來汴泗交流處
作客依然斗轉杓

半生古意儘消磨
挽日空勞壯士戈
宿莽難邀論水客
曉

風猶怨拔山歌路開空闊中原氣夢繞迷漫淮海波欲向
都梁采香草美人天末奈愁何

龍興寺

上頭棟宇閱興衰事去英靈失護持雲氣何年接芒碭山
門猶自枕鍾離

聖朝寬大仍遺構勝國蒼涼祇斷碑欲叩恆河沙數劫人
間除是法王知

歸心

歸心日夜壓征驂霜雪殘年景不堪多少重山遮不住淮
南行盡又江南

左二過飲贈詩一章

兩載疲津梁十日卸行李靜思論文歡舉念卽吾子掃除
甫擁篲將迎遽倒屣感君意更親憐我窮未死腐芥與曲
鍼吁嗟彼哉彼虹采不惜藏乃獲千人指朝心飛扶桑暮
恨飲弱水伊誰饋營蘇愁絕不自己所惜生平人纏綿結
端綺對酒靡不陳傾吐請更始衰親望子心未必非甘旨
首務以力養百事尙根柢綺才如懸毫厥穎難久恃端賴
經籍腴養之佐驅使古人不盡言落落藏故紙食蔗先食
根食魚先食尾博趣貴引伸趣得胡不喜持登大雅堂庶
摩作者壘蹉跎愧故人深言冀君唯動爲數年別中年各
在邇念此愴以悲君亦霍然起霜月知人心盈空澈塵滓
酒面迎朔風血熱變殷紫其此明光中相與去疑似敬矣

千秋客勸哉天下士

壬辰除夕

無多骨肉話依依珍重相看燈燭輝
飲爲病遊千里減瘦因吟過萬山
歸老親白髮欣簪勝稚子紅爐笑作圍屏卻
百憂成一喜去年孤淚此時揮

兩當軒集卷第七

兩當軒集卷第八

武進黃景仁著

古近體詩四十六首

人日艤舟亭探梅過飲左雲在齋頭

多時欲探東城梅披衣徹曉衝風來
釵枝粟蘂一相對妙意遠勝千林開
此意看花知葢寡罇前盡是同心者
戰深冰雪見性情畧去元黃得聲價
主人愛客客滿堂今夕何夕同燭光
道衡風雨思家苦杜甫江湖引興長
去年此日空相憶珍重緘詩淚沾臆
兩度看花當故人故人常共花無色
重遊拍手當花前買醉何須計十千
傳家幸有酒鑪在除却鑪邊何處眠
三更以後譁笑急春氣先乘酒香入

半酣已徹瓊爐圍百罰翻教玉山立我願好花常不開我
願故人常舉杯杯停花放易分手百歲今宵能幾回

偶題齋壁

天雷隙地位方牀竹作比鄰草護牆四壁更無貧可逐一
身久與病相忘生疏字愧村翁問富有書憐市僧藏漸喜
跣趺添定性大千起滅滿空光

舟夜寄別左杏莊

時別家
一日也

水聲到枕今何時醉中別君心自知扁舟夢斷五更冷風
雪無邊助淒警傾耳微聞折竹聲推篷已失蜚鴻影別時
梅花飛滿觴坐君花下之草堂相看都怪語言少一夕離
居已斷腸歸夢今宵路猶憶明日相思在江北牛渚風濤
百丈深歷陽烟樹千重黑差喜百年交道真不須零落苦
嫌身更將愁水愁風意寄爾高歌擊筑人

悲來行

我聞墨子泣練絲爲其可黃可以黑又聞楊朱泣歧路爲
其可南可以北嗟哉古人真用心此意不復傳於今今人
七情失所託哀且未成何論樂窮途日暮皆倒行更遶漏
盡鐘鳴聲浮雲上天雨墮地一升一沈何足計周環六夢
羅預間有我無非可悲事悲來舉目皆行尸安得古人相
抱持天空海闊數行淚灑向人間總不知

烏江弔項羽

憤王遺像黯承塵已事空悲五裂身百二山河銷赤炬八

千子弟走青燐好尋鬼母揮餘淚自有獅兒作替人王氣
東南來尙早不須亭長在江濱

橫江春詞

門外晴洲香草香浣紗生小愛春陽柳絲幾尺花千片蕩
得春江爾許長
不羨成都濯錦新鴨頭一色皺魚鱗逢人都道風波惡如
此橫江思煞人
家住橫江古渡頭年年江上望歸舟郎若歸時今日好常
時那見水平流

瀨水洗女祠

覆舟漁父共心期識在窮途死固宜豈必士爲知己用曾
聞事不使人疑沈埋情種潭于八來往英靈風滿旗試問
若耶溪畔女可應羞煞沼吳時

對月感懷

對酒欣相共鉤簾不放遮低徊問清影辛苦照誰家秋士
霜前草春人鏡裏花看來俱有盡終古一長嗟

飛騎橋

鼓吹聲沈樓櫓消紫髯幾爾困雄梟半生意氣三篙水一
騎飛騰兩版橋引袂削深凌盪寇停罇涕破賀公苗經看
壁壘眞兒戲尙有垂楊映畫橈

廬州客舍寄宜興萬黍維時黍維將來而余又將
之泗州矣

高齋日暮舉孤幌客中楊柳垂垂長驚心春事日漸闌故
人不至何由往笑聲在耳言銘心良會無多易疇曩抱柱
會慙橋下期買舟未果山陰訪出門時約過黍維榻來閉
置金斗城坐席未温車鐸響依人去住不自由身與桔槔
同俯仰聞君亦欲看山來吁嗟道路疲吾黨後先蹤跡良
悠悠破壁畱詩拂蛛網鴻雁猶歸江上音煙波不共淮南
賞料爾裝成罨畫溪尚有落花隨畫槩

清明後七日雨中宿浮槎寺階下紫牡丹一本開
盛有二百餘頭筒河夫子作歌命和其韻

高僧得句夢子瞻石泉淙淙榆火炎身遊一徹未來境看
花更使游心麝虛涼佛地盡諸相恍見天女空中拈一百

六口過雖瞥七十九朵誰先占見清桐風吹雨雲暗牖眼
界燦若初陽暹山深地古春力厚芳菲疇識先時覘野禽
銜瓣著佛頂長蚊結網攀茅簷不憂僮父肩土擔時怯樵
子腰閒鎌怪渠骨相匪枯槁所置身處何其廉問花毋乃
太自苦良久不語花口箝花如道我代花答託根有土百
不嫌魏家千葉本冠世苦被俗論相髡鉗有心終是恥王
後遺世獨立逃詖儉非花我已得花意卻笑積習徒沾黏
慈恩深院古所賞顏色豈肯長淪淹解畱光豔照我輩真
識遠勝干夫兼臨風顧影若意氣爲見學士拈髭髯三章
倏似大篇易魂攝筆底花慙慙藉令相見稍前後空山韻
事誰能添深龕彌勒亦莞爾笑我小綴言詹詹夜分花睡

我亦睡切勿放下蘆花簾

淨槎山寺

舊志山自海上浮來梵僧見之曰此者闍一峯也寺為梁武帝女捨身處

山形如槎雲浮浮者闍峴翔雲上頭

梵語靈鷲山為耆闍峴山見水經注竺法

維西來意祖三弟子一塊淨土虛根雷梵僧碧眼親識得指點怪秘傳千秋山靈非神亦非鬼夢落深宮愁帝子夢中山在縹緲間按圖來求走中使一朝覓得隨布金山花笑指宮車臨鉛脂洗淨功德水富貴了寂鐘魚音此時老公失精魄利帝利來徒面壁空談已著旬波魔百身那懺臺城厄金甌已缺荒故宮劫灰雷鎮無心峯珠珞散為塵土盡樓臺半逐雲烟空從此槎浮失歸路天女常留散花處天邊鷺駕如可招卻跨山頭決空去

山閣曉起

一榻重嵐裏酣眠卽道心澗幽琴響枕雲厚絮添衾不識夜長短那知山古今來宵塵驛夢何處更相尋

泥塗嘆

經旬滯愁霖春泥苦融泄但積征途艱那補漏天裂沈濁潰欲浮流陰蕩難閉頓令如坻平投足起窾凸略激頽已過甫涉蹶先滅譬作瀚海行中道勢無輟誰能坐衣冠或可養魚鼈汗下聖所悲欲往氣為結未免相經過疇能避湔涅蜀道胡云難隴坂未嫌折尺寸有可持遑復畏蹉跎縱有穆馭良為功遜乘屨足土苟不離都盧等跛蹙幾訝方者輿不為載重設人憾那得齊勞生動膠轕僕御嗟何

集八 五
辜先後百推搢將毋累微軀心境兩兀艱畢景不半程用力亦云竭前途更淤洳欲鏟無巨鐵所望陽光開庶聞嘆聲絕

合肥城樓

箏笛聲消極浦間逍遙津水尚灣環英雄浪捲都無跡城郭珠沈竟不還生惜文鴛名似錦舊傾韋虎望如山登樓此日容清嘯詞客淮南鬢已斑

定遠

重岡百盤疊勢與遙山爭淮雲一片落遠見南譙城高樓矗三兩雉堞蒼蒼明岡轉忽不見漸聞雞犬聲馱鈴聞市喧卸裝孤館清烏烏起畫角月上詩已成稍進館人語聞數來朝程飯冷酒力薄淒苦中宵情平頭促就枕明發宜五更一笑遣之去且當吟洛生

紅心驛

茅檐三尺五里長牛馬矢雜泥築牆牆頭時出野花朵辛苦細趁行人香紅塵欲暗日卓午綠柳尙綰時青陽急須小憩飢尙可不妨夢罷炊黃粱

夜過黑山宿澗溪

雨程易陰晦不料夜已果極望無人烟悽惶落途左有山當我前黓黑夕靄裏稍入意已迷甫涉路無妥撲額崖奔崩仇足石碎瑣怪光晴屢凝寂響魄虛墮一水忽界空遠現白瑳瑳波聲漸碎甸山徑更埒坳何因喜忽狂嵌天見

村火逝爲褰裳行捫石少危坐

不識水深淺連山落長堤堤水互出沒逕涉忘東西游魚
觸我足溜急風淒淒中望渺涯涘四索鮮據攜行行偶出
水一綫浮沙泥恐極失軀命悲淚翻澌澌烟中忽人語境
幻慮百迷行近覺漁舍伊軋巨網提叩言岸將及霍然心
坦夷經過得此險世路無高低投村買餘勇已有晨雞啼

望泗州舊城

泗淮合處流湯湯作此巨浸如天長長天垂幙滉欲動區
區城郭何能當城雉齮齮出波尺高谷深陵感疇昔十萬
樓臺罔象居千年生聚蛟鼉宅號聲未絕波壓頭人身魚
首隨波流當衝水伯擇人啖餘者到海流方休可憐生氣

今未息水上綠烟時蕩浮有山濱湖州已徙草草依山作
塵市我來正值春水生下者依然在中泚屋角帆開幾尺
風牆頭釣下三竿水若遇海上王方平卽此又是蓬萊清
嗟嗟橫目一何慘令人慷慨思平成我念徐揚一隅地下
流稍富魚鹽利防河堰築連雲高此間詎免迴瀾沸伊誰
繪此生靈愁獨立蒼茫一垂涕

登泗上樓

竟夜轟濤似鼓鞞登樓水勢與雲齊百靈自掣龜山鎖萬
怪須然牛渚犀對此茫茫空禹跡笑人寂寂有隋宮故鄉
東望揚州近說到風波夢已迷

泗州喜洪大從姑孰來

集八
貽山枕洪澤淮瀆勢瀆滉壓山十萬戶枕席波聲上水氣
裏爨烟居民雜象罔推窗納揚徐披圖驗墳壤詭秘信莫
窮臨覽斯云廣俯仰雲濤閒太息成孤賞所思苦未遂所
苦忽復申輕裝犯腥雨長拊來故人故人青霞侶嗜好昔
所親巖中易成別遊駕每同騁去歲江淮閒輾轉如浮梗
看山盡黟障論水達汝潁各吐曾中奇分揚出才境酣采
君怒張清氣余薄領相樂傲行路依依似形影濠州仲冬
雪置酒行別君參差歸雁行前後依斜曛梅開故園早時
復同酒樽相顧忽不樂前路云將分余攀小山桂爾訪天
門雲從茲一失去方嗟別離始何意馬牛風忽會東西水
前日得君書知君隔江住對酒歌青山當筵舞白紵舊日

同歡場憐君獨行處來時江北道應落干棠梨春水久滯
漫將毋頓塗泥高驄爲君秣斗酒爲君攜灑掃湖上閣放
爾爲雄詞百怪待彈壓首者無支祈

偕稚存望洪澤湖有感

濤聲入耳心所嚮與君同家楚江上比年渴走塵埃閒見
此洪流亦神王湖寬一面青嶂開立久萬仞高寒來水風
吹衣日落去石氣蕩魄雲飄回遠天黯慘湖變色雁飛不
度鳴何哀沈淪九鼎自太古蒼茫那見蟻珠吐浪靜似響
鯨人機風便欲遞馮夷鼓此時倒影動樓閣咫尺已畏風
雷作前驅青兕淮神過長波砮巖大魚躍得觀如此將毋
歸回頭半湖森雨腳大陸浮沈且未休吾儕身世將安託

歌聲如哭何處歌沿山半州純浸波庚辰奚仲不在世嗚呼奈汝歌者何

曉過滁州

四山過一雨城門開綠陰角聲起木杪一散嘔啞禽抱城水瀾瀾過客驅車臨犬吠不出郭人烟多在林依依識熟路了了悅方音客冬記經此歸路方駸駸雨雪迫徂態所歷無幽尋茲來春夏交烟景何沈沈層樓隱疊巘長雲蔽遙岑最高知瑯琊翠色披滿襟側聞釀泉水云可醒人心行伴苦相趣凝望愁淫淫兩度不一訪有愧茲邦深

羹頡侯塚

掩釜何如轢釜來區區恩怨事堪哈可知大度輸臣叔肯

向軍前乞一杯

客冬從滁州肩輿至瓜步輿夫老壯各一今過此壯者復昇余行問其同伴則去年從瓜步歸病死於道矣爲之愴然賦詩

崎嶇風雪裏送我渡江行健語因貪醉逢山每報名遽看筋力盡能免涕洟橫爾尙會相識前途酒共傾

過全椒哭凱龍川先生

有序

戊子鄉試公同考入闈景仁受知於公薦而未售庚寅公再入闈中疾作同事諸公皆危之公曰此輩辛苦吾以身殉不惜也披閱不輟竟卒景仁頻年奔走終未得一展拜盡弟子之禮隱隱之中上

負知己今過所治不覺愴然爲此詩也

臥龍山勢盤嶙峋驅車欲過車摧輪前途叱御且休發腹
痛爲感生平恩甘棠到眼盡遺愛摩挲惻愴傷心魂生無
一面死未哭此慟不比西州門三年枉自設虛位那盡生
存感恩誼此日青山疊疊愁當年紅燭條條淚辜負看花
住馬心不才自分甘拋棄苦爲方干抵死爭誰知爭命原
無計此曹心力鎮相憐反自拋殘辛苦地兩度戰場餐血
腥先生手持千佛經飄然上赴玉樓去爲道此閒多不平
遂令感誦溢吾黨豈獨賤子緣私情暴腮點額無所憤從
此江東亦將隱斥鷃何來負翼風蟬螿只附傷心本丹旒
多時返故鄉楚雲燕月兩茫茫可知德政崇碑下尚有門

生弔夕陽

飲全椒城南江氏園

水煙中豁飛彩橋清歌隔水聲相招衣冠忽集晉南渡竹
石占斷梁北譙三三月尙殿春在時閏三月七七樹已愁風飄
庭前杜鵑將謝可憐閒處好欄檻明日牆外鞭絲搖

雨中過夾山

始夏天驕陰濱江地拳絡山回忽幽幽衣溼常漠漠林未
盼侶稀巖際懸裝薄後徑訝拒前起勢悟藏落雨氣合四
圍顏景反埋壑白石參沈雲回光閃儻爚中轉百里雷上
突千紀鶴瀑注甫避踵谷響屢應躡冥搖朱草莖暗護紫
庭鑰恍逆真靈過深恐光怪作奇賞逝莫追理境鬱難拓

謝客不可招茲觀坐消爍

浴湯池

俗名太子泉在和州

瀕江多溼居物疵帝心悼厥力藉熨攻首事資潤導漏液
坎莫縫立柴釜時煥檻脈根熒臺風戶位丹竈蒸沸爲雲
浮望氣知候到沆漭迴陽輪瓔珞結風燾詎惟起痿痺實
亦功旱澇遠客至以踵居民多見耄心悅銳先裸膚切怯
初蹈腠理覺豎奔膏肓擬丁鑿疾去喜微眩漿流患真耗
霍然起披衣羣山動孤操

橫江曉渡懷張如良秀才

掛席指碧山長洲屢回互晴霞媚餘鮮微波淬輕素隱隱
金陵城蒼蒼歷陽戍東西界徂川低昂起中渡絕流爭去

心戀舊淹回顧乍聞榜人歌彌切之子慕念我漂何歸思
君美無度結桂閒層阿折麻悵歧路風波一阻長永矣愁
朝暮

樓上對月

飄飄白袷當回風三五月照高樓空一城露瓦高下白幾
處已滅窗燈紅病怯臨窗倦憑几苦被鐘聲促人起樓頭
皓魄已天中郭外青山如夢裏濛濛薄霧蒼蒼烟山意亦
如人可憐一絲清氣其來往星辰自動高高天風景依稀
似前度此閒恍是高寒處夜深誰念朗吟人願化遼東鶴
飛去

聞龔愛督從河南歸

不飲忽忽傾千觴朝聞故人還故鄉夢魂飛渡京口樹覺
來海月烟茫茫七年南北頻回首別後狂名滿人口結客
都從燕市多愛才肯落平原後昨夜聽鷄函谷來衣裳紫
氣猶餘否洛陽縣裏花愁風銅駝陌頭荆棘叢知君懷古
意鬱勃乃使黃河一綫盤君胸緱山唳夜鶴少室聞清鐘
下視唐陵漢寢竟何物嗚呼此遊真足驕吳儂我行瓠落
無所惜歲歲年年去鄉國所媿平生拜母交阿蒙碌碌常
如昔北海空勞薦禰書仲宣未是依劉客太白樓頭不見
君謝公宅畔苦離羣欲邀紅燭三更話除借青山一片雲
我輩相望各蒼老萬事期君致身早不然痛飲酣青春坐
擁列鼎兼重茵哀絲激肉寫懷抱堂前醉倒三千賓出門

大笑忽萬里莫使醜雞笑煞人

夜步池上

獨居每不樂臨軒思怏怏主人好池臺良夜誰過訪烟月
靄已盈幽意成一往地僻驕蹇園荒悅榛莽百卉遞暗
馨微風愜孤賞擾枝識禽翻靡草辨蛇枉轉緣境蒙茸寄
此懷颯爽屢步蕩虛氣微哦破沈響竟漏將何悰銜歎歸
空輓

久雨寄示顧文子

梅雨經旬未放陽舍南舍北盡汪洋只疑天意驕河伯可
念人窮到子桑巨蝮公然爭臥榻轟雷多半雜崩牆故人
鄰巷無消息問訊明朝駕一航

調顧文子兼示穉存

久憶東吳顧文學南州客況故依然
參苓半減經師俸蔬筍還供都講筵
懶甚拋書妨坐臥養深持論徹中邊
東頭尚有窮書記妒爾天涯比屋緣

失題

我家乃在東海東蜃樓見慣心空空
十年弔影深山裏每顧山猶亦心喜生
耶滅耶何足嘖一嘖一笑誰爲真偉哉
造物焉用我不幻烟雲幻此身

花津

一燈低昂向船久萬兀千搖至津口
船頭正與沙堤平拂面穆穆水楊柳
風前魚鼓已報更岸上人家尚沽酒
客來

小飲飲卽醺三兩依依話村叟歸塗忽散草上螢顧影防
驚竹間狗時清喜無盜賊警波平未是蛟龍藪江湖自我
野興長鷗鳥於人宿緣厚沈吟露下那得眠獨倚篷窗數
星斗

過高淳湖水新漲舟行蘆葦上十餘里

前舟疾如飛後舟忽追及何物舟背沙沙聲葭葦叢中靡
舟入初疑舟在淺水行蓑蓑尺五黏天青誰知一篙不及
底五月已見湖波平我昔經過始冰渙水枯盡是黃沙岸
等閒重作倚篷人浩晶芋眠一悽斷如雲帆影去復來似
雪沙鷗聚還散先時弱質易驚秋此日偏令遠目愁霜清
會見根株出莫送飛花上客舟

會真賦 高淳先大父官廣文處也景仁生於此四歲而孤
至七歲始歸今過斯地不覺愴然

茫如積世渺疑塵昔藉荒齋幾度新當日白頭猶哭子而
今孤穉漸成人同驂竹馬應無伴反哺林鳥尙有親歸去
恐傷慈母意莫將風景話酸辛

錢塘江舟中看月

越峯青斷海門青之字江流入杳冥月出島烟常帶溼潮
回沙氣半浮腥眼將天水分離合身與魚龍判睡醒烟外
何人尙吹笛夜深愁嫩子胥靈

富陽

曉天瞳瞳江漠漠估帆四開估客樂樟亭飲來酒未消已
在富春城下泊潮來直浸城根平城門晝開聞市聲人居
此閒亦何好水色山光餐不了沙頭愁煞捕魚人捕得魚
多賣錢少

過釣臺

桐君入我夢趣我推篷起一鳥啼巖間雙臺峙雲裏十載
道旁情惟有狂奴耳更酌十九泉飽看桐江水

新安程孝子行

孝子名文元歛之洪坑人母疾割左臂以療逾年
復疾孝子將割其右爲姊氏覺急掣止之相守侍
疾不與以便母竟卒孝子廬於墓三年歲時輒向
墓號慟至今如常嘉興鄭誠齋先生掌紫陽書院

時孝子嘗從游先生詳言之雖跡近愚孝然其愚
不可及矣爰爲作歌

新安江水何鄰鄰我聞一歲來問津問我何數數愛其地
氣盤礴人風古淳山高澤深土膏厚宜產獨行君子先天
民六年往復卒未見匪不可見難乎真有程孝子洪坑人
是果以孝親其親行孤跡晦人罕道嘉禾夫子爲我言之
頻言其去歲來負笈見其戍削骨立如束薪顏色雖黯慘
其中含古春經年其寢處曾不輕笑嘔退乃察其隱悲淚
流盈巾問之不肯語卻立常逡巡一風吹衣露其肘有大
如掌瘡痂新孝子不及掩窮叩乃得知其因生年十三五
常如日初寅嬉戲父母側謂此若可終其身一朝父也天

所奪搥胸慟絕呼蒼旻方知父母年瞬息皆堪珍回頭顧
慈母夕若不保晨思父兮斷絕事母兮苦辛晝行不離側
夜臥不沾席與茵積此垂數載母病牀吟呻孝子卒無計
割股可療聞之人是夕風雨急黑雲垂車輪抽刀暗室室
生白搥肉多處揮如銀肉乎我母寄汝命快意一割無由
擲作羹進母霍然起吾肉效矣他何論背人出瘡處隱隱
還鱗鱗是何靈異無所苦合處若有神鍼紉無何母病忽
大漸徹晝夜侍無欠伸俄然起四顧出屋行逡逡姊氏怪
其狀偵至趨隨塵見其持刀袒臂向空祝側目視臂刀且
掄急從後至反其臂責以戕體傷親神從茲形影不相失
母亦奄逝當茲辰孝子長呼姊誤我一毀不復能支振三

年廬墓如一近淚赤土無荆榛林深地曠絕聞見皓鳥
矐雀日久投懷馴至今歲時省墓輒號慟慟時四野愁霾
屯我思孝子孝愚乃成其純世人薄天性勦說搖其脣毀
傷固有戒殺身亦成仁百無可冀冀一濟一髮尙欲回千
鈞此時遑及引文義何者孝子何忠臣先生聞言亦領首
命我縱筆爲敷陳自慚腕弱不能達賒願欲貢王爲賓景
星祥鳳出示世一挽末俗歸於醇不然刻君黃山三十六
峯頂坐使姓氏萬古同嶙峋

兩當軒集卷第八

